

МЕСЯЦА МАРТА В 19-Й ДЕНЬ.

СВЯТЫХ МУЧЕНИК ХРИСАНФА И ДАРИИ

Стихиры, глас 4.

Подобен: Дал еси знамение:

Божественного познания * прием осияние, * просветил еси очи, премудре, сердца твоего, * и прелести мрак отгнал еси смысленно, * и исповедал еси Христа, * плоть приемша всех Господа. * Отонудуже укрепляемь * силою Духа, Хрисанфе, * мук вышше явился еси, всехвальне.

Вражия прелести * и сласти разжжения, * яко паучину, вменил еси, * во мрачне же затворе став, * Божественным сиянием озарился еси, * и благовония разумного исполнился еси, * посреди стоя смрада, * и привел еси, яко невестокраситель всеизряднейший, * Христу невесту непорочну, * осквернити тя тщащуюся.

Уязвившися рачением * сладчайшим Зиждителя, * прелести безбожия до конца уклонила еси * и чертога Божественного вместила еси внутрь, * вневествившися Христу мучении многими телесе, * Дария великоименитая, * Божественное приятелище Духа, * страдальцев удобрение * и дев украшение.

Слава, и ныне, Богородичен:

Немиощь и расслабление, * Дево Мати Всенепорочная, * души моя преложи в крепость и силу * страхом и любовию творити же * и деяти оправдания Христова, * яко да избегну огня нестерпимаго * и наследие Небесное * и жизнь непреходимую * Тобою восприиму, веселяся всегда.

Крестобогородичен:

Распинаема Христа Человеколюбца * видящи, Пречистая, * и ребра ископоваема копием, * плачущи, вопияше: * что сие, Сыне Мой? * Что Ти безблагодатнии людие воздаша, * за яке сотворил еси добрая им, * и тщишия безчадствовати Мя, вселюбезнейший? * Удивляюся, Благоутробне, * Твоему вольному распятию.

Канон, егоже краегранесие: Тя, златозарный мучеников цвет, почитаю. **Кир Иосифа.**

Глас 4.

Песнь 1

Ирмос: Моря чермную пучину * невлажными стопами * древний пешествовав Израиль, * крестообразныма Моисеовыма рукама * Амаликову силу в пустыни победил ест.

Венцем, паче злата сияющим, мучениче, украшаемь * и мучения сияя добротами, Владыце предстоиши, * о нас моляся, ты чтущих, досточудне.

Уязвился еси сладким желанием, мучениче, Зиждителя твоего * и, красная мира презрев, силу всю подал еси твоего сердца, Хрисанфе, * к Желаемому ти усердно.

Верою вооружся, низложил еси многокозненнаго, * тебе приложшаго, мучениче, женскою сластию прельстити, * и чистоты честен сосуд, Хрисанфе, был еси.

Богородичен: Естеством Божественным непреступный, * приступен мне явися, от Тебе, Дево, плоть приемь, * Егоже Дария желаючи, терпеливно пострада * и невестнически Тому приведесея.

Песнь 3

Ирмос: Веселится о Тебе Церковь Твоя, Христе, зовущи: * Ты моя крепость, Господи, * и прибежище, и утверждение.

Злато, искушено мучений огнем, был еси, * царских, Хрисанфе, носяй страданий изображение.

Риторов оставль глумление, * пленицами уловился еси учеников, Хрисанфе, * прясне тебе умудрившаго.

Повинулася еси рачителю, невестовождящему тя Христу, всемудрая, * честныя ради веры рачителя плотскаго оставльши.

Богородичен: **П**лотию рождьяся из утробы Твоя, Дево, Иисус, Чистая, * невесту чисту, мученицу Себе Дарию обручает.

Седален, глас 3.

Подобен: Красото девства:

Краснейшую доброту возжелел еси, и видимыя доброты претекл еси, * и привел еси Христу златыми воистинну словесы твоими, * Хрисанфе блаженне, Дарию славную, * страдания претерпевшую и томителя посрамльшую. * С неюже вся ны поминай, верою совершающия память вашу.

Слава, и ныне, Богородичен:

Недомысленно и непостижимо есть, Владычице Богорадованная, * еже соделанное о Тебе страшное Божие таинство: * ибо Необыннаго, заченши, родила еси, * плотию обложена от пречистых кровей Твоих, * Егоже всегда, Чистая, яко Сына Твоего, моли * спастися душам нашим.

Крестобогородичен:

Поносную, Щедре, смерть в распятии волею претерпел еси, * Тебе же рождающая, Христе, зрящи, уязвляшеся. * Еяже мольбами за милосердие милости Твоя, * едине Преблагий Человеколюбче Господи, ущедри * и спаси мир, взямай мира грехи.

Песнь 4

Ирмос: **В**ознесена Тя видевши Церковь на Кресте, * Солнце праведное, * ста в чине своем, * достойно взывающа: * слава силе Твоей, Господи.

Духа облистающа зари чистое сердце твое * всего светозарна тя, мучениче, соделаша, усердно зовуща: * слава силе Твоей, Господи.

Истканную тя Божественныя благодати свыше, Творец облече нетленною ризою, * непорочно соблюдша тело, блаженне, * и яко победителя венча.

Доблестию сердца оттрясл еси сласти телесныя, * доброту несравнительною Божественною наслаждаемь, * и, радуясь, совершил еси мучения твоего подвиг.

Обожилася еси по причастию, страстоносице, Боготворнаго соединения * и в Небесныя вселилася еси чертоги, радующися, * яко непорочная невеста Владыки твари.

Богородичен: **С**облюд Тя Деву, яко прежде рожества, * по рожестве, Пречистая, из Тебе воплотися недомысленный, * Дарию мученицу невесту Себе приводя.

Песнь 5

Ирмос: **Т**ы, Господи, мой свет, * в мир пришел еси, * Свет Святыи, обращающа из мрачна неведения * верою воспевающа Тя.

Восхищен ум от вещных творя, * вяжемь, злобу вражию, страстоносче, разорил еси, блаженне.

Чистоты рачитель быв священнейший, * претворил еси девы огнепальную любовь ко Господу, прехвальне.

Повержена зря и ногами спопираема мучителя, * радованною мыслию Владыку, преблаженне, величал еси.

Богородичен: **К**то может Твое сказати таинство, о Всечистая! * Бога Слова, паче ума бо и слова, сугуба естеством, родила еси.

Песнь 6

Ирмос: **П**ожру Ти со гласом хваления, Господи, * Церковь вопиет Ти, * от бесовския крове очищися * ради милости от ребр Твоих * истекшею Кровию.

Поюща Владыку всех, приснопамятне, * свет с Небесе, всюду тя окружив, просвети, * заключена в темнейшей храмине, Хрисанфе.

Рим тя, мучением честным славимаго, златовидну якоже звезду, стяжав, мучениче, * украшается подвиги и Божественными твоими, Хрисанфе, чудесы.

Красна, преудобрена же и преславна, мученице Дария дева, * показавшия Слову краснейшему, * уневестила еси болезнями всякими телесными.

Богородичен: **М**лада Ты яко Детица Дева роди, Превечнаго Слова, * Егоже желающе, отроковицы * Сею в след Тебе, всех Царю, невестнически приведошася.

Песнь 7

Ирмос: **В** печи авраамстии отроцы персидстей * любовию благочестия паче, * нежели пламенем, опаляеми, взываху: * благословен еси в храме славы Твоя, Господи.

Цвет мучеников златовиден ты был еси, * собор же страдальцев привел еси Христу * Божественными словесы твоими и чудесы, мучениче Богоприятне, * с нимиже верно ты ныне ублажаем.

В хлевине скверней затворена, нага ты, блаженне, * Божественными благовоии, славою световидною Иисус просвещает, * Егоже чистою мыслию, всемудре, возлюбил еси.

Зверя хранителя тебе девства Христос посла, * пагубу нечестивых отгоняща яве, песнопойущей тебе, всехвальная: * благословен еси в храме славы Твоя, Господи.

Богородичен: **П**о существу Божественному Сый неописан, * в недрах Твоих, Дево, бысть по нам плотию описуемь. * Благословена Ты в женах еси, Пренепорочная Владычице.

Песнь 8

Ирмос: **Р**уце распростер, Даниил * львов зияния в рове затче, * огненную же силу угасиша, * добродетелию препоясавшися, * благочестия рачители отроцы, взывающе: * благословите, вся дела Господня, Господа.

Твердым, блаженне, помыслом противяся семуудренному, * строгания претерпел еси телесная * и, свещами опаляемь, неопалимь пребыл еси, со отроки воспевая, Хрисанфе: * благословите, вся дела Господня, Господа.

Премудростию украшен Христовою, обуил еси немудрых шатание, * и ум льстиваго посрамил еси, Еву прельстившаго, * пленив благочестно сего оружие, мудре, * и привел еси невесту Богу, избранну веры ради.

Единением души плотскаго избежасте совокупления, * чистыя сосуды Вседержителя явистесь * и в храм принесостесь Небесный, страдальцы, вопиюще Христу: * благословите, вся дела Господня, Господа.

Волею Божиею плотския страсти удержавше, * огонь испепелиша мук Хрисанф и Дария росую Духа * и венцев жизни улучиша, поюще: * благословите, вся дела Господня, Господа.

Богородичен: Яко шипок посреди терния житейскаго, Пречистая, * Бог обрет Тя, нескверную, * вселися во утробу Твою чистую * и благовония таинственнаго мир исполни, взывающий: * благословите, вся дела Господня, Господа.

Песнь 9

Ирмос: Камень нерукосечный * от несекомья горы Тебе, Дево, * краугольный отсечся, * Христос, совокупивый разстоящаяся естества, * тем, веселящся, Тя, Богородице, величаем.

Священнословящу Божественная, * Божественное воинство тебе приложися, лести скверныя избавлься, * и мечем непорочныя жертвы нас ради, яко овчати, * мученицы Пожержемуся принесошася.

Явистесь посреди зверей, якоже агнцы, страсотерпцы, * воплощение проповедающе Божественное Излиявшагося даже и до плоти, * и болезнми неболезненную кончину Божественне наследовасте.

Днесь светло праздновати всяк град же и страну Рим созывает град * Божественныя страсти и борения, * яко всечреждение невещественное, предлагающий вас, святии.

Взяти бысте к безмерней славе, Хрисанфе мучениче и Дарие, * и вседержительному Слову, венценосцы, вкупе предстоите, о нас молящся, * блажащих вас всегда.

Богородичен: Трещет помысл и сердце, помышляюще Твое рождество недомыслимое, Отроковице: * Бога бо Слова чревоносила еси, * избавляющаго Тобою всякия нужды чтущия Тя.